



Peter Berliner
Elena de Casas
Tina Enghoff

Eqqumiitsuliorneq ataatsimoorfiillu. Takussaaneq, Nakimaassuseq, Paasisimasagarneq

Det Norske Kulturråd aamma Statens Kulturfond Ilisimatusarfimmut 1.000.000 NKR koruuninik pisassaqaartissipput eqqumiitsuliornerup ataatsimoorfinni nutaanik isiginnittaaseqalernerit, ilinniagaqarnerit innuttaaqatigiinnilu nutaanik pingaartitaqalernerit aqutigalugit Kalaallit Nunaanni illoqarfinni nunaqarfinnilu uummaarissunik atasinnaasunillu ataatsimoorfeqalersitsisarneranik misissuineramik naammassinninnissamut atugassanik.

Ilisimatuutut misissuinerimi suliniut Ilisimatusarfimmi Peter Berlinerimit, community psykologiimi isumaginnittoqarnermilu suliaqarnermi professoriusumit – aamma *Meeqqanik, Inuusuttunik Ilaqutariinnermillu Qitiusumik Ilisimatusarfimmi* pisortaasumit – ingerlanneqassaaq. Tamanna pissaaq assiliisoq assilialioartortorlu Tina Enghoff peqatigalugu, assilisaminut saqqummersitaminullu tunngatillugu apeqqutinik isumaginninnermut tunngasunik suliaqartartoq. Tina Enghoff nunani tamalaani katersugaasivinni saqqummersitsivinnilu saqqummersitsisarsimavoq ukiunilu kingullerni Kalaallit Nunaanni suliniutinik 'outreach'-inik suliaqarsimalluni.

• Ilisimatuutut misissuineq tamanna ukiunit qulinit amerlanerusuni kingullerni suliniutini *Paamiut Asasara*-mi aamma *Siunissaq uagut pigaarput*-mi – suliniutini marlunni Bikubenfondenimit aningaasaateqarfinnillu allanit taparserneqarluni naammassineqartuni – misilittagarilerneqarsimasunik ingerlatitseqqiineruvoq. •

Suliniutip qulequtaraa **Eqqumiitsuliorneq ataatsimoorfiillu. Takussaaneq, Nakimaassuseq, Paasisimasagarneq**, suliniutaavorlu ukiuni marlunni ingerlanneqareersoq tamatumani misissorneqassalluni eqqumiitsuliornerup illoqarfinni nunaqarfinnilu ataatsimoorfinnik atasinnaasunik innuttaaqatigiinnilu akiuuffiusinnaasunik pilersitsinerimi pingaaruteqarlunnassusia. Misissorneqassaaq eqqumiitsuliorneq qanoq eqqarsalersitsinnaasoq isiginnittaatsinullu nutaanut qanoq ammaasinnaasoq taamaalillunilu ataatsimoorfinnik ataqatigiinnermillu, innuttaaqatigiinni mikinerni kissaatigineqartunik, siuarsaanissamik tigussaasunik takorluugassiilluni. Ilisimatuutut misissuineq malittarinnilluni misissuinerussaaq pisimasunut assilisanik tunngavilinnut atatillugu, assillu illoqarfinni sumiiffinnik ammasunik tamanillu atorneqarsinnaasunik innuttaaqatigiinnilu atasinnaasunik inuiaqatigiinnit kalaallinit aallaaveqartunik pilersitsinnermut atorneqassallutik. Misissuisoqassaaq ilisimatuutut misissueriaaseq allanik peqataatitsisoq aallaavigalugu, illoqarfimmiut nunaqarfimmiullu piumasut tamarmik ilisimatuutut misissuinerup immikkoortuini tamani peqataatinneqarlutik paasisimasagarluartutut aalajangeeqataasussatullu.

Ilisimatuutut misissuineramik suliniut malinnaavigineqassaaq ataatsimiititaliamit ukunannga ilaasortaaffigineqartumit: rektori Gitte Adler Reimer, Ilisimatusarfik; Mette Sandbye, professori ilisimatusarfimmilu pisortaasoq, Institut for Kunst- og Kulturvidenskab, Københavns Universitet; Louise Wolthers, eqqumiitsuliat oqaluttuarisaaneranni ph.d., nakkulliisuullunilu assiliasat kusanassusiinik ilisimatooq Hasselbladstiftelsenimi, Göteborg; ilisimatusarfimmi pisortaasoq Gestur Hovgaard, Inuiaqatigiilerinermik, Aningaasaqarnermik Tusagassiormillu Ilisimatusarfik.

